

辛亥革命河南起义

殉难烈士传略

辛亥革命河南起義殉難十一烈士傳略

目次

(一) 總紀

(二) 傳略

- (1) 張烈士毓厚傳略
- (2) 張烈士照發傳略
- (3) 王烈士天傑傳略
- (4) 劉烈士鳳樓傳略
- (5) 徐烈士振泉傳略
- (6) 單烈士鵬彥傳略
- (7) 張烈士得成傳略
- (8) 李烈士幹公傳略
- (9) 王烈士夢蘭傳略

辛亥革命河南起義殉難十一烈士傳略 目次

(10) 李烈士鴻緒傳略

(11) 崔烈士德聚傳略

附孫烈士振冰傳略

王烈士治軍傳略

高烈士樹敏傳略

辛亥革命河南起義殉難十一烈士傳略

(一)總紀

清宣統三年。河南中州公學監督楊源懋。高師兼公立法校監督畢太昌。方以革命思想。灌輸一般學子。洎武漢首義。各省風起雲湧。河南地居衝要。防範尤嚴。諮議局議員等謀響應。冒險開會。擬陰曆九月二十日宣布獨立。未果。楊源懋偕公立法校監學楊銘西。及劉雪亞。劉粹軒。羅銳青等。赴洛陽。聯合陸軍及嵩縣大俠王天縱。慈玉琨等數千人。定陰曆十月初一日攻洛。又遭失敗。楊源懋劉雪亞王天縱等。遂赴潼關。投陝西革命軍張鈞。克陝州新安。時清毅軍翼長趙倜。反攻至潼關甚急。畢太昌西上。說趙倒戈。公舉爲河南都督。無效。公立法政分校監學王庚先。李心梅。及留日警務學員周維屏李福遐。法政學員王從周。師範畢業劉莪青。高警學員李心昂等。再接再厲。共議以小行宮校址爲革命機關。桐茂當店東劉青霞女士。慨捐銀三千兩。爲黨中經費。集合同志百餘人。每夜秘密開會。積極進行。李心梅赴河北聯絡彰衛懷三府志士韓警亞等。擬掘斷京漢鐵道。阻清軍南下。王從周劉莪青往豫東歸德考城。聯絡仁義會黨六七千人。擬據隴海路綫。適張烈士鍾端。由日回汴。詢王庚先革命方略。庚先曰。此間刊就木質圖一。文曰河南軍政府都督之印。

辛亥革命河南起義殉難十一烈士傳略

二

以甲乙丙丁四大將軍。號召各縣民衆之有革命實力者。已派孫振蘇張四箴赴汝宛等縣。姚黃鄭硯農赴許鄆等縣。秘密運動。其他各縣代表來接洽者。亦大有人。君至當推首席。是夜開會。詢謀僉同。悉聽指揮。烈士卽席言曰。方今漢陽失守。上海民立報。著泣血篇。全章大字。罵河南人爲袁黨。爲滿奴。爲漢奸。諸君見之乎。上海和會。河南代表李燦。在議席無發言權。諸君聞之乎。吾輩再不努力奮鬥。將自絕於黃帝子孫。沉痛淋漓。衆皆俯首。泣數行下。少頃。有質者曰。此舉果能成功乎。庚先起立曰。吾輩爲河南三千萬同胞爭人格。原不計夫成敗。衆皆破涕爲笑。舉手歡呼。願効死命。時周維屏靳培之爲祕書。吳芋僧擬檄文榜文等件。俱交河南圖書公司王天傑繕印。南區警署劉泗芳。警校教員李福遐。聯絡省城巡警。李幹公聯絡開封仁義會黨。張照發聯絡巡防兵士。吳古岳聯絡陸軍小學學生。王庚先聯絡南關陸軍三營馬一營炮營。高書範李錦公沈雲珊等數十人。赴湖北襄樊。設立共和會。歡迎革命軍北伐。爲之嚮導。督練公所科長何伯龍。科員黃復東。隨時報告軍情。並嚴督進行。大有一日千里之勢。部署已定。公議十二月二十二日（卽陰曆十一月初三日）晚十一時舉事。以火爲號。事前清撫齊耀琳聞訊。急電北廷袁世凱。謂河南王庚先。張鍾端。岳秀華等。勾結土匪。指日起事。袁覆電嚴爲防範。卽派兵前來。王庚先曰。此電袁誠有意。不曰嚴拿。而曰防範。可速他移以避耳目。當

將關防軍器旗幟彈藥等類。移至高師學校。不料二十二日。被仁義會叛徒張光順。江玉山告發。是晚九時。巡防統領柴得貴。率兵士兩營。先查抄公立法校。及第一中學。圖書公司。又包圍高師學校。逮捕同志張鍾端等數百名。押解督練公所。王庚先李福遐。因赴山東會館。布置司令部。得免於難。旋齊耀琳命營務處商作霖。巡警道鄒道沂。開封府呂耀卿。祥符縣舒樹基。審訊張鍾端。張照發。王天傑。劉鳳樓。徐振泉。單鵬彥。張得成等七人。於廿四日晨。就義西關。廿五日。又將李幹公。王夢蘭。李鴻緒。崔德聚。四人。在南關鎗決。共殉難十一人。其他寄押數百人。正在分別嚴訊之際。忽接上海和會來電干涉。俱解回原籍開釋。而河南十一烈士之名以成。三千萬同胞之人格。亦因十一烈士之殺身成仁。得維持於不墜。夫河南地處腹心。四面受敵。志士奔走運動。秘密進行。其艱苦危險。較他省爲甚。其悲憤慘死。又較他省爲多。然而前仆後起。直至革命成功而後已。茲特就省城十一烈士殉難情形。略述梗概。公議建祠修墓。永昭來茲。至外縣殉難諸烈士。如劉粹軒紀廉泉死於陝州。孫振蘇趙伯階死於魯山。高樹敏死於方城。王治軍死於鄧州。將一併附祀焉。

(二) 傳略

(一) 張烈士毓厚傳略

辛亥革命河南起義殉難十一烈士傳略

辛亥革命河南起義殉難十一烈士傳略

四

烈士諱鍾端，字毓厚，河南許昌人，清光緒乙巳，以諸生考送留學日本。肄業中央大學。旋入同盟會。與同志組織河南雜誌。鼓吹革命。宣統三年返國。適民軍起義武昌。烈士欲舉豫響應。迺赴鄂與黎都督元洪。規畫方略。卽至豫東歸德諸屬。聯絡仁義會起事。仁義會者，與中會之變名也。在鄂豫連界及秦中。稱江湖會。又名哥老會。革命黨同志。多資爲臂助。其居汴宋間者。更名仁義會。名目雖歧。而排滿興漢之宗旨則一。烈士擬藉其力與北伐軍互爲策應。未幾返汴。適同志王庚先等組織秘密機關於開封公立法校。推烈士爲首領。約定十二月二十二日夜舉事。屆時防營統領柴得貴。突率防兵數百。圍抄各處。並捕烈士等四百餘人。清撫齊耀琳。命營務處商作霖。及警道府縣會審。烈士慷慨直言曰。方今人心思漢。胡運將跽。武漢首義。全國景從。我豫管轂南北。舉足輕重。此間同志四百餘人。謀據省垣。共圖大舉。定於廿二日夜。引火爲號。先由城內兩千民軍發難。以千五百名進攻撫署。派六十名敢死隊爲先鋒。以三百名牽制滿營。二百名保守司令部。四十名敢死隊督隊。二十名暗殺黨。刺斃齊耀琳柴得貴。並由陸軍工程炮隊一二營及馬一營入城援助。陸軍學生接濟子彈。本城巡警一千三百名。保守秩序。成則促韃虜之命。敗則爲共和之魂。商作霖等強誣以聚匪放火。呵責手板四十。繼以軍棍。烈士毫無懼容。謂曰。汝以我爲何如人。卽何如人。日後自有公論。復訊汝係何職。答曰河南

軍政府總司令。兼參謀長。同黨共有幾人。答曰滿奴漢奸外。皆是同黨。至此喝退。二十四日晨。烈士與張照發等共七人。同時就義。是時風雪颼厲。天地晦冥。說者謂爲英靈所感云。烈士游東七載。恆眇家居。辛亥殉難。年三十四。所娶日婦。孿生二子。長夢梅。次兆梅。民元春。陳君伯昂。攜其家人回自日本。日婦旋返國。二嬰留養於大婦。現皆肄業武昌高級中學。

(2) 張烈士照發傳略

烈士諱照發，字建周。山東濟甯人。少年入河南巡防營爲兵士。魁武英傑。天性純篤。積功洊擢游擊銜。以久居汴。在小行宮前治產一所。與公立法校爲鄰。時已四十。配某氏。無所出。伉儷式好。養晦待時。宴如也。辛亥武昌首義。烈士每聞同院寄居學生周斌甫等。宣傳革命。心爲之動。又閱上海民立報。深痛清軍焚燒漢口之酷。輒髮指眦裂。誓必滅虜。拯救同胞。時防營統領柴得貴。率巡防數營。駐紮城內。防範甚嚴。烈士以久歷戎行。營內多舊識。可游說。曉以大義。使河南早日光復。地方免受糜爛。適有防營總稽查張光順。及友人江玉山等。與烈士密議。願投革命軍。且當夜發誓。以身家財物作保。烈士深信不疑。遂通知民軍司令部許以標統三名。營長十人用資羈縻。十二月二十二日晚。民軍司令部。將各委任狀繕就。付烈士轉交張光順等。並委烈士爲協統。移時柴得貴突率防兵數十名。入烈士家搜抄無遺。

。並逮捕烈士。押解督練公所。會審時。烈士供稱。此次舉義。予担任聯絡防營發難。民軍會黨。同時協進。迺予不慎。介紹漢奸張光順江玉山等。竟爲所賣。恨無知人鑑。願速死謝同胞。二十四日晨。與張鍾端諸烈士同被害。所居宅宇二十餘楹。當被柴得貴沒收。烈士妻因成瘋癲。民元後。日在街衢。叫罵滿奴漢奸慘殺民黨。今又爲民國官吏。甯弗羞死。時柴得貴改爲陸軍旅長。聞烈士妻言。痛恨刺骨。暗派兵士押遣外縣謀害。以滅其口。烈士亡時。春秋四十有二。無嗣。

(3) 王烈士天傑傳略

烈士諱天傑。字超萬。鞏縣城東興仁溝人。生而穎悟。好讀書。家貧。屢輟學。因鄉人某在滬辦中國公學。始游學海上。越數年。學識大進。凡所著述多尙氣節。嗣見清政不綱。與人談國事。輒痛哭流涕。謂匪革命。難與圖存。聞者多感動。未幾歸豫。在汴垣設圖書公司。日與留東學生。暨諸志士過從甚密。辛亥武漢義師起。各省響應。惟豫中寂寂無聞。烈士恥之。與學界同志。竭力運動。又隻身赴潁州歸德等處。聯絡仁義會衆。約期舉事。到者數千人。清十二月二十二日夜被逮。供認革命軍敢死隊總隊長。清吏詢以敢死隊作何事。答曰。殺盡漢奸。保全同胞。建立中華民國。不幸爲汝等所獲。惟求速死。以成吾志。二十四日晨。與烈士張鍾端等同

遇害。時年二十五。烈士歿後。父老而痛子情切。遂致疾棄世。弟天祥。慟兄成誓。烈士乏嗣。取弟子琮爲後。女培榮。妻張氏。事姑以孝聞。

(4) 劉烈士鳳樓傳略

烈士諱鳳樓，字子修。襄城人。河南高級師範畢業。充一中教員。傲骨嶙峋。制己森嚴。每指貪官污吏曰。此滿奴當盡剷除。指劣紳土豪曰。此漢奸當盡殲滅。嘗謂。吾爲黃帝子孫。宜光復漢族。驅逐異種。彼滿奴之富貴功名。吾曷榮焉。聞者匿笑。烈士則逕行不疑。辛亥武漢首義。烈士拔劍起舞。謂素志可酬。卽與張君鍾端，王君庚先，岳君秀華，諸同志。秘議革命進行方略。十二月二十二日夜。事洩被逮。謂清吏曰。余係一中教員。憤虜政失綱。國亡無日。欲盡力革命。爲黃帝子孫留一線生機。清吏曰。你居何職。答曰。民軍督隊長。誅鋤滿奴。光復漢業。是吾職志。清吏斥退之。與張烈士等一併殉難。春秋三十三。弟鳳尙。汜南名士。妻武氏。子一。名登鰲。豪俠有父風。女二。長適同邑辛店宋某。次適蔣莊賈某。皆書鄉世家。

(5) 徐烈士振泉傳略

烈士諱振泉，字靜亭。沁陽白馬溝人。父應方。早逝，母氏撫育成立。幼讀書。聰

穎絕倫。年十四。本縣高小畢業。嗣肄業初級師範。以家貧竟輟學。平日留心時事。頗晰世界潮流。不甘鬱鬱久居。謀於族人。欲出游圖樹立。爲宗族光。衆嘉其志。共議釀金壯行色。抵汴。交遊廣衆。與仁義會志士相納結。辛亥秋。公立法校革命機關成立。烈士喜曰。此可以酬素願矣。遂託王烈士天傑。介紹入革命軍。願充敢死隊。任先鋒隊長。民軍司令張鍾端壯之。卽委爲敢死隊督隊長。十二月廿二日夜九時被捕。臨審烈士自認不諱。與張烈士鍾端等同遇害。時年二十四。乏嗣。堂弟振淮。以子家訓嗣爲烈士後。

(6) 單烈士鵬彥傳略

烈士諱鵬彥。開封人。居學院街。世奉天方教。父國慶。兄文生。家貧。少失學。稍長。逢人問字。頗悉國家事。清末。革命潮流。彌漫全國。汴垣仁義會聲勢甚大。專以推倒滿清爲職志。烈士隱身茶肆。傾心納結。充該會區分部首領。及王庚先等。在小行宮公立法校。組織革命機關。烈士聯絡會中壯士五百人。攜名冊。往投効。奉民軍司令委爲敢死隊長。命於十二月二十四日夜。率所部屯集西南城坡新法校中。候城內火起。進攻撫署。不意事洩。被巡防營兵士。密佈校外。捕獲百餘人。押解督練公所。烈士以敢死隊長名義。與張烈士鍾端等。同在西關遇害。臨刑神

色自若。從容語觀衆曰。我一死無所恨。寄語老母。仍以回教禮葬我。時年二十一。母李氏。現七旬有二。哭子喪明。家計甚蕭條云。

(7) 張烈士得成傳略

烈士諱得成。字子才。陝西長安人。少年從軍來豫。粗通詩書。知大義。寄居汴垣理事廳門。精武術。膂力過人。爲仁義會主幹人物。辛亥武漢革命軍起。烈士躍然曰。此大丈夫立功時也。旋由李烈士幹公介紹入革命軍。充暗殺黨。糾集會中同志二十人。將於十二月廿二日夜舉義時。刺殺齊耀琳劉鴻順柴得貴等。事洩被捕。就審時。自謂河南軍政府暗殺黨。聚議發難。光復漢業。清吏微笑。喝令退下。二十四日拂曉與烈士鍾端等。同遇害。時年廿八。臨刑尙大呼革命萬歲。共和萬歲不置云。

(8) 李烈士幹公傳略

烈士諱幹公。字勉齋。世居商水縣李家集。爲邑中望族。賦性聰穎。因家貧未卒讀。然慷慨激昂。幼時聞古英雄游俠忠義節烈故事。輒眉飛色舞。躍躍欲試。識者早許其非常人。弱冠後遊汴。充常備軍稽查。得與開封仁義會黨相結納。及胞兄錦公。由日回國。在開封設立大河書社。中外同盟會員。咸以該社爲集議機關。烈士任招待。時翻閱由東寄回民報河南雜誌等書。遂灌輸革命思想。每向仁義會宣傳排滿

辛亥革命河南起義殉難十一烈士傳略

一〇

興漢主義。辛亥秋，武昌首義。汴中同志謀響應。烈士担任聯絡仁義會。及南關軍隊。十二月廿二日。由張烈士鍾端委赴南關。招待由歸德考城來省仁義會數千人。面授機宜。視城中火起。率衆進攻。不期事機洩露。與仁義會首領王夢蘭等同被執。然猶侃侃而談。痛論種族革命不可緩。二十五日在南關與王夢蘭。李鴻緒。崔德聚四烈士。併遇難。時年三十歲。有子敦乾。十六年夏病卒。兄錦公。方擬爲擇繼云。

(9) 王烈士夢蘭傳略

烈士諱夢蘭字華亭。世居考城縣馬家村。兄弟七人。烈士居仲。生而岐嶷。輕貨財。好結納。有朱家郭解風。幼讀書。不瑣瑣於章句。及聞人談嘉定揚州屠城事。憤然曰。是惡可忍。嘗從同邑張君斗垣處。獲讀民報。喜曰。有方法。有導師。今後光復故物。惟恃吾輩努力耳。宣統三年春與劉我青張斗垣李慨卿張雪亭諸同志。創立仁義會於蘭考各縣。並介紹胞弟夢祥入會。不數月。聯合同志五六千人。暗設堂鄉村間。夜分講授革命大義。插血爲盟。是年秋。武漢首義。汴中革命機關。派劉我青王從周來考接洽。即委爲考城一帶民軍總指揮。期以十二月二十二日率衆赴汴。烈士先期選驍勇二千餘人。自製大刀數百柄。效衷甲故事。且傾家得錢千餘緡爲助。臨行與父母訣曰。兄弟六人。留事高堂。請勿以兒爲念。抵汴。佈置曹宋二門外。不意爲漢奸告密。二十三日在城外被捕。二十五日與李幹公諸烈士。同殉難南關。

時年二十五。子二。文生。誨生。

(10) 李烈士鴻緒傳略

烈士諱鴻緒，一名心敬。世居鞏縣孝義里。生性聰敏。八歲就傳。儻不羣。每聽講。默不一語。而至理要義。悉以意會。家貧。年十五。棄學經商。在汴垣逐什一之利。常以滿漢政治不平爲憾。辛亥武昌起義。各省響應。烈士時年二十八。膂力強健。智慮篤純。由同鄉王烈士天傑。介紹入革命軍。奉派出城與駐軍聯絡。定十二月二十二日夜起事。城內舉火爲號。屆時火未發。烈士即率同志數十人出。沿街大呼曰。我輩係革命軍。將爲民衆解除不平等政治也。彼時事機早洩。巡防營滿佈街衢。即被捕。遇害南關。妻石氏。子二。長本通。次天保。時皆幼穉。今雖成人。然家世清貧。幾難爲生。

(11) 崔烈士德聚傳略

烈士諱德聚。字懷仁。鞏縣白沙村人。少有大志。舉止不凡。七歲就學。刻苦自勵。家雖貧。不以餒志。旋以他故廢讀。即至省垣景華章習商。工貨殖術。年二十五。升號中領袖。旋入仁義會。力倡種族革命。屢年所得。盡充會費。辛亥秋。武昌革命軍起。各省景從。汴中同志在河南公立法政學校。設革命機關。烈士率仁義會衆

加入數百人。十二月二十二日晚。革命軍司令張鍾端。命烈士偕李烈士幹公。出城招待仁義會。不意事機早洩。烈士與李幹公李鴻緒及仁義會首領王夢蘭等。悉被逮。廿五日。同在南關遇害。與張烈士鍾端等十一人。叢葬一處。烈士歿年二十八。妻尙氏。有女二歲。無子。取堂弟德有子承泰爲嗣。家境困窮。母子紡織爲生。

附 孫烈士振淼傳略

烈士諱振淼。字榮甫。一名浩。河南葉縣人。直質好義。篤行君子也。清宣統元年。考入河南公立法政學校肄業。三年秋。武漢首義。烈士卽約王君從周。劉君莪青。赴考城。李烈士慨卿家。聯絡該處仁義會。與省城革命機關。一致行動。未幾烈士回省。由學監王君庚先派赴汝魯鄭寶等縣。運動該處紳民具有革命思想者。不意十二月廿二日省城起義失敗。殉難者有張鍾端等十一烈士。上海民立報誤登王君庚先爲殉難之一。烈士在魯山見報。立卽回葉。晤黃君佩蘭號啕大哭。繼而曰。叶三(庚先字)先生既已殉難。予何忍獨生。當與佩蘭永訣。赴魯山繼續革命工作。遇害於該縣西門外。亦云慘矣。烈士與王君素無一面之識。是年春王君由漢來省。寓某棧。烈士見前法校長楊源懋曰。吾等以提倡革命爲主旨。今王君來汴。何不位置。以資臂助。時公立法校另設分校于山東會館。卽薦王君爲分校監學。議既定。烈士至某棧。見王君曰。昨已力薦先生於楊校長。允委爲法校監學矣。厥後誤信王君遇難。而卽以身殉

之。世有見義勇爲生死不渝如烈士者乎。可以風矣。

附王烈士治軍傳略

烈士諱治軍。字敬五。河南郟縣人。清季以河南武備學校畢業。送日本成城學校警務科肄業。辛亥秋。湖北革命軍興。間道至武漢。充北伐左軍糧台總辦。奉黎督命。北伐軍入襄樊後所有糧秣。概由河南供給，烈士隨先鋒隊至襄樊。籌措北伐。是時樊城立有共和會。爲南陽各屬學生所組織。而以鄧縣學生爲多。專爲歡迎革命軍。並籌糧秣。以備供給焉。陰歷十二月二十三日。先鋒隊馬雲卿。率革命軍五營至樊城。二十七日馬先鋒由樊入新野。正月初一日抵南陽。時襄陽招討使季玉麟。亦於初一日由河口率大軍萬餘人。抵鄧縣。南陽謝鎮寶樹。聞風逃逸。季雨霖至鄧後。委應城李宜吉爲鄧縣知事。初二日烈士至鄧。開大會於舊察院。聲言鄧縣知事。應由本地紳民公舉。或由先鋒隊長馬呈委。季雨霖職守襄樊。不應越省委人。言語之間。頗有衝突。演說畢。李宜吉請烈士入縣署。發手鎗三響殪之。李宜吉隨隊仍返河口。是烈士因北伐演講而被刺。其資志以歿。較之北伐陣亡將士。其慘痛爲尤甚。特略爲記之。以表烈士之死有餘恨云。

附高烈士樹敏傳略

辛亥革命河南起義殉難十一烈士傳略

一四

烈士諱樹敏。字捷卿。鄧縣人。父清輝。以商業起家。急公好義。遇人顛隤。扶之尤力。烈士其三子也。天性純篤。少遭貧困。學不厭。嗜弱冠後應聘爲縣東白牛鎮小學校長兼教員。循循善誘。後生賴以成全者甚夥。辛亥秋。武漢舉義。北伐左軍先鋒隊長馬雲卿至襄樊。烈士往迎作嚮導。年終革命軍抵南陽。謝鎮寶樹。率士卒北竄。其營長董懷珍包炳耀守方城。阻革命軍北上。烈士奉命勸降。並宣諭宛北各縣。至方城界。遇董營某兵士與偕。示以來意。極言革命軍勢不可當。宜棄暗投明。俾共和早成。人民可享無限幸福。該兵士僞爲服從。誘至城內。見董包二營長。夜深拖至城外。遂遭慘死。至今無有能言其殉難之處。與骸骨所在地。且當時烈士南至襄樊。北至汝郟。往返數次。卒以身殉。其奔走革命爲獨勞。死亦爲至慘。若不急爲褒揚。何以慰忠魂而昭來茲。謹紀其始末。以備徵集者有所採焉。(完)